

**Uunga siunnersuut: Tarnimikkut nappaatilinnik kiffaanngissusii'aaneq allatigullu pinngitsaaliisummik iliuuseqarneq pillugu Inatsisartut Inatsisaata allanngortinnaa
pillugu Inatsisartut inatsisaat nr. xx, xx. xxx 2015-imeersoq
(Pinngitsaaliisummik katsorsarneqarnermi eqqarsarfissinneqarneq, Napparsimasunut siunnersortinik atorfinitssisarnermi aalajangiinissamut pisinnaatitsineq,
Maalaaruteqartarneq aamma eqqartuussivilersuussisinnaaneq)**

*(Peqqissutsimut aamma Nunat Avannarliit Suleqatigiinnerannut Naalakkersuisumit
saqqummiunneqartoq)*

pillugu

Ilaqtariinnermut Peqqissutsimullu Ataatsimiititaliap isumaliutissiissutaa

Siunnersuutip aappassaaneerneqarnerani saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Tillie Martinussen, Demokraatit, siulittaasoq

Inatsisartunut ilaasortaq Jess Svane, Siumut, siulittaasup tullia

Inatsisartunut ilaasortaq Laura Táunajik, Siumut

Inatsisartunut ilaasortaq Vivian Motzfeldt, Siumut

Inatsisartunut ilaasortaq Aaja Chemnitz Larsen, Inuit Ataqatigiit

Inatsisartunut ilaasortaq Peter Olsen, Inuit Ataqatigiit, sinniisussaq

Inatsisartunut ilaasortaq Aqqaluaq B Egede, Inuit Ataqatigiit, sinniisussaq

UPA 2015-imi ulloq 18. Marts 2015-imi siullermeerinerup kingorna siunnersuut ataatsimiititaliamit sukumiisumik misissorneqarpoq.

Siunnersuutip imarisaa siunertaalu

Siunnersuut tarnimikkut nappaatillit kiffaanngissusii'arneqartarnerat allatigullu pinngitsaaliisummik iliuuseqarneq pillugu Inatsisartut inatsisaat nr. 24, 3. december 2012-meersumut atuuttumut allanngutissatut siunnersuutaavoq.

Tarnimikkut nappaatillit pillugit pissutsit arlallit nukitorsarneqarnissaat siunnersuuteqarnermi siunertarineqarpoq. Tarnimikkut Nappaatillit Maalaarutaannik Aalajangiisartut aalajangigaat pillugit maalaarutit Kalaallit Nunaanni eqqartuussivimmii eqqartuussisumit suliarineqartalernissaat siunnersuutigineqarpoq. Aammattaaq napparsimasup katsorsartinnissaminut akuersisinnaanissaa siunertaralugu eqqarsarnissamut naleqquttumik

piffissaqartitsisoqassasoq (taamaattoq sivisunerpaamik ullut pingasut) siunnersuutigineqarpoq. Aammattaaq pinngitsaalialluni iliuutsinut nalunaarsuivik napparsimasoq pillugu nalunaarsukkanik siunissami ilaqaqtinnejqartalissasoq siunnersuutigineqarpoq. Napparsimasunut siunnersortinngortitsinissaq eqqarsaatigineqartoq pillugu napparsimasoq siunissami oqaaseqarnissamut periarfissinneqarnissaa aamma siunnersuutigineqarpoq. Aammattaaq siunnersuutigineqarpoq naammagittaalliuutinut aalajangeereernissamut utaqqimaartinneqartunut tunngatillugu Tarnimikkut Nappaatillit Maalaarutaannik Aalajangiisartut kingusinnerpaamik naammagittaalliuutip tiguneranit ullut arfineq marluk qaangiutsinnagit aalajangiisassasut.

Siunnersuutip Inatsisartuni siullermeerneqarnera

Saqqummiussutip Peqqissutsimut Naalakkersuisuugallartumit saqqummiunneqartup saniatigut partiinit: Siumumit, Inuit Ataqatigiinnit, Demokraatin, Partii Naleqqamit aamma Atassummit oqaaseqartartut allakkatigut saqqummiussissutaat saqqummiunneqarput.

Allannguutissatut siunnersuutit tamanit isumaqatigineqarput.

Tarnimikkut napparsimasut atugaat siullermeerinermi sukumiinerusumik eqqartorneqarput.

Tarnimikkut nappaatilinnut tunngatillugu nalunaarut 2010-meersoq oqallinnermi eqqaaneqarpoq, suliassaqarfimmilu nalunaarusiap nutarterneqarnissaa pisariaqartinnejqarnersoq isumaliutigineqarluni. Matumanit inuit piginnaatitaaffi tarnimikkullu napparsimasut atugaasa kiisalu ilaquaasut eqqarsaatigalugit nutartikkamik nalilersuisoqarnissaa siunertarineqarluni. Tarnimikkut napparsimasut immikkut atugaat eqqarsaatigalugit ineqarnerannut tunngasut, nakkutiliineq aammalu sulisut ilinniarsimasut minnerungitsumillu oqaatsit atorneqartut atorlugit oqaloqatigineqartarnissaasa pingaaruteqarnera eqqaaneqarput, matuma ataani tarnimikkut napparsimasut katsorsarneqarnissaasa qulakkeerneqarnissaanut suliniutit ilanggullugit.

Tamanna tunngavigalugu siunnersuut Ilaqutariinnermut Peqqissutsimullu Ataatsimiititaliamut suliarineqaqqittussanngorlugu innersuunneqarpoq.

Tusarniaanermut akissuteqaatit

Siunnersummut nalinginnaasumik nassuaatini tusarniaariaaseq nassuiarneqarpoq. Tusarniaariaaseq atorneqartoq aamma tusarniaanermut akissutit pilligit allakkiaq saqqummiunneqartoq ataatsimiititaliamit immikkut maluginiarneqarput.

Ataatsimiititaliap siunnersuummik suliarinninner

Siunnersuummik matuminnga ataatsimiititaliap suliarinninnermini tarnimikkut nappaatillit pillugit nassuaat 2010-meersup (UPA 2010/99) tassani innersuussuterpassuit ilanngullugit misissornissaannut immikkut tunngavissaqarsimavoq.

Tarnimikkut napparsimasut pillugit nalunaarutip 2010-meersup 2012-imi killiffissiuilluni malitseqartitsinermi suliap ingerlanneqarnissaanut 2013-miit 2017-imut pilersaarusiorraqarsimasoq ataatsimiititaliamit aammattaaq paasineqarpoq.

Matumunnga atatillugu erseqqissaatigineqassaaq Kalaallit Nunaanni qarasaasiaq atorlugu tarnimikkut nappaatilinnut katsorsaasarnermut piviusunngortitsinissamut periusissat pillugit siunnersuutitalerlugu nassuaammik 2012-imi aamma suliaqartoqarsimammat.

Siunnersuutip siullermeerneqarnerani kalaallisut saqqummiussisummi oqaasertat kukkuneqartut malugineqarsimasoq Peqqissutsimut Naalakkersuisuugallartup 27. marts 2015-imi allakkatigut paassisutissiissutigaa ataatsimiititaliamit maluginiarneqarpoq. Paassisutissiissutigineqartoq naapertorlugu saqqummiussisummi kukkuneq “Nunatta Eqqartuussivia” allassimasoq “Kalaallit Nunaata Eqqartuussivia”-nik allassimasussaagluarpoq. Kukkuneq inatsisisatut siunnersuutip oqaasertaani takuneqarsinnaanngilaq.

Tarnimikkut nappaatilinnik kiffaanngissusisiaaneq allatigullu tarnimikkut nappaatilinnik pinngitsaaliisummik iliuuseqarneq pillugit Inatsisartut inatsisaannik nr. 24, 3. december 2012-imi Inatsisartut akuersimmata inatsisitigut sinaakkutissat pillugit kaammattuutit 2010-meersut piviusunngortinneqarsimammata ataatsimiititaliamit naammagisimaarlugu oqaatigineqassaaq. Siunnersummi matumani tarnimikkut napparsimasut atugaasa nukittorsarniarneqarnissaat pillugu siunertarineqartoq ataatsimiititaliamit nuannaarutigineqarpoq, pineqartumilu inatsisitigut sinaakkutit matumani ilanngullugu napparsimasut piginnaatitaaffiisa nukittorsarneqarnissaannut tunngatillugu pitsaasup tungaanut alloriarnertut isigisariaqartariaqarluni.

Tarnimikkut napparsimasut pillugit nalunaarummi 2010-meersumi kaammattuutigineqartut 2012-imilu killiffissiuilluni malitseqartitsinerit ataatsimiititaliamit ingerlaavartumik malinnaavigineqassapput tamatumunngalu atatillugu oqaloqateqartarneq ingerlattuarumallugu. Kaammattuuterpassuusut takorluugarpassuusullu aammalu tarnimikkut napparsimasunik sullissinerup nukittorsarneqartuarnissaa ineriartortinneqartuarnissaalu siunertaralugit sulisoqartoq ataatsimiititaliamit maluginiarneqarpoq. Pineqartoq suliniutillu arlalinnut sammisuupput taamaattoq allaaserineqarluarsimallutik. Kingusinnerpaamik 2016-imi imaluunniit 2017-imi killiffissiuinerup nutarterneqarnissaa ataatsimiititaliap kaammattuutigissavaa, taamaaliornikkut kaammattuutit piviusunngortinneqarnissaannut assiliaq ersarissoq ataatsimoortorlu malinnaavigineqarsinnaaqqullugit. Innarluutillit pillugit

isumaqatigiissut naapertorlugu tarnimikkut nappaatilinnut piumasaqaatit qanoq naammassineqarsinnaanersut nassuaammi immikkut ilangussinissamut ilassusiisoqarnissaat ataatsimiitaliamit kissaatigineqarpoq.

Innarluutillit pillugit isumaqatigiissut nunatsinnut atuuttuummat aammalu innarluutillit pillugit isumaqatigiissummi inuit “sivisuumik tarnimikkut piginnaasakillisimasut” aamma ilanngullugit pineqarmata ataatsimiitaliamit eqquumaffigeqquneqarpoq.

Inissiat aalajangersimasut tarnimikkut nappaatilinnut innersuunneqartannginnissaat pillugu Kommuneqarfik Sermersuumut Ineqarnermut Naalakkersuisoqarfik 2014-imi nalunaaruteqarnera Inatsisartut Ombudsmandiata isornartorsiuineranik kinguneqarpoq.

Ombudsmandi matumani pingaartippaa atugassarititaasut pineqartut - tarnimikkut napparsimasunut ataatsimut isigalugit - ingerlatsineq pillugu inatsiseqarnermi naligiimmik pinnittussaanermik akerliusutut isumaqarfigineqarsinnaammata. Ombudsmandip aammattaaq oqaatigaa naligiimmik pinnittussaaneq tamanna innarluutillit pillugit isumaqatigiissut tunngavigalugu paasineqartussaammat.

Innarluutillit pillugit isumaqatigiissutip atuutilersinneratigut nunatta innuttaasut inatsisitigut pisussaaffigaa inatsisit allaffisornermilu sullissinerit isumaqatigiissummi piumasarineqartutut naleqqussassallugit.

Tamanna tunngavigalugu innarluutillit pillugit isumaqatigiissummut tunngatillugu pisussaaffiit sukumiinerusumik qulaajarneqarnissaat ataatsimiitaliamit pingaaruteqartutut isumaqarfigaa. Inuttut piginnaatitaaffiit takkuitsoorneqarsinnaanera pinngitsoortinneqarnissaat qulakkeerumallugu inunnut tarnimikkut nappaatilinnut inuttut pisinnaatitaaffiit qulakkeerneqarnissaasa nassuiarneqarnissaat ataatsimiitaliamit inassutigineqarpoq. Matumani piginnaatitaaffiit taakku inatsisitigut qulakkeerneqarnissaat malitinneqarnissaallu qulakkeerneqarnissa siunertarineqarpoq.

Innarluutillit pillugit isumaqatigiissutip atuutilersinneqarnissaanut iliuusissatut pilersaarut qaugu naammassineqassanersoq tamanullu saqqummiunneqarnissaat pillugu Naalakkersuisut nalunaaruteqarnissaat ataatsimiitaliamit kissaatigineqarpoq.

Siunnersuutip aningaasaqarnikkut kingunerisassai

Siunnersuutip piviusunngortinneqarneratigut aningaasatigut kingunerisassai siunnersuummi nalinginnaasumik oqaaseqaatini allaaserineqarput. Siunnersuutigineqartoq pisortanut aningaasaqarnikkut kinguneqarnavianngitsoq matumani oqaatigineqarpoq.

Ataatsimiititaliap inassuteqaataa**Siunnersuut ilusimisut iluseqartillugu akuersissutigineqassasoq ataatsimiititaliap isumaqatigiittup inassutigaa**

Taama oqaaseqarluni isumaliutissiisummilu oqaatigineqartunik paasinnilluni siunnersuut ataatsimiititaliap aappassaaniigassangortippaa.

Tillie Martinussen,
Siulittaasoq

Jess Svane, siulittaasup
tullia

Laura Táunajik

Vivian Motzfeldt

Aaja Chemnitz Larsen

Peter Olsen

Aqqaluaq B Egede